



**Univerzitet u Sarajevu
Upravni odbor**

**PRAVILNIK
O USLOVIMA I POSTUPKU DODJELE NAGRADA IZ FONDA „AKADEMIK EDHEM
ČAMO“**

Sarajevo, juli, 2010. godine

Na osnovu člana 27 Zakona o ustanovama („Službene novine RBiH“, broj: 6/92, 8/93 i 13/94) i člana 14, 153 i 162 Pravila Univerziteta u Sarajevu, Upravni odbor Univerziteta u Sarajevu je na 35. sjednici održanoj 15.07. 2010. godine, donio

**P R A V I L N I K
O USLOVIMA I POSTUPKU DODJELE NAGRADA
IZ FONDA „AKADEMIK EDHEM ČAMO“**

Član 1

U cilju podsticanja naučno-istraživačkog, stručnog i umjetničkog rada studenata, te promocije i podrške studentskom stvaralaštvu, utvrđuje se fond iz kojeg će se nagrađivati najbolji studentski radovi naučnog ili stručnog sadržaja, odnosno umjetnička ostvarenja.

Ovim Pravilnikom se uređuju uslovi i postupci za ostvarivanje prava na materijalnu podršku koju dodjeljuje Fond „Akademik Edhem Čamo“ (u daljem tekstu: Fond) u cilju ostvarivanja svoje svrhe.

Član 2

Novčana sredstva iz Fonda mogu se dodijeliti isključivo za ostvarivanje svrhe Fonda kako slijedi:

- Novčana nagrada za podršku studentskim naučno-istraživačkim radovima, projektima, umjetničkim ostvarenjima i drugim oblicima studentskog stvaralaštva na Univerzitetu u Sarajevu;
- Novčana nagrada studentu ili grupi studenata za izuzetan uspjeh u predstavljanju Univerziteta, javnom nastupu ili djelovanju (dramska, filmska, likovna, muzička, sportska grupa, udruženja studenata i sl.).

Član 3

Pravo učešća na konkursu za dodjelu nagrada imaju svi redovni studenti I i II ciklusa studija Univerziteta u Sarajevu, uz obavezu da ispunjavaju sve uslove iz konkursa.

Član 4

Na konkurs za dodjelu nagrada iz sredstava Fonda studenti mogu prijaviti rad ili projekat naučnog ili stručnog sadržaja odnosno umjetničko ostvarenje jednog ili više autora.

Za nagradu nije moguće prijaviti seminarski niti završni rad I i II ciklusa studija, ali se može prijaviti rad koji je u vezi sa temom završnog rada. Rad mora imati mentora iz reda akademskog osoblja.

Istom studentu nagrada se može dodijeliti samo jednom u toku pohađanja jednog ciklusa. O dodjeli nagrada vodi se posebna evidencija sa svim potrebnim podacima.

Član 5

Dodjela nagrada iz sredstava Fonda može se odobriti samo ako prijavljeni studenti zadovolje opšte uslove tražene u konkursu za dodjelu nagrada, a njihov rad, projekat, umjetničko ostvarenje, nakon procedure vrednovanja zadovolji postavljene kriterije.

Prilikom procjene, koju vrši Odbor Fonda, biće vrednovani sljedeći kriteriji:

- Originalnost i inovativnost rada, projekta ili umjetničkog ostvarenja;
- Značaj rada, projekta, umjetničkog ostvarenja u unapređenju i razumijevanju područja istraživanja/strukte, te unapređenju kulture i umjetničkog stvaralaštva;
- Relevantnost i kompatibilnost teme koja se obrađuje u radu/projektu/umjetničkom ostvarenju;
- Nivo postignutih rezultata / trajanje istraživanja / samostalnost / uložen istraživački napor u postizanju rezultata, a u odnosu na uobičajenu spremu studenata.

Član 6

Novčana sredstva Fonda se dodjeljuju putem javnog konkursa, koji se raspisuje na osnovu odluke Upravnog odbora, u pravilu jednom godišnje.

Tekst konkursa za dodjelu sredstava mora obavezno sadržavati sljedeće podatke:

- Namjena za koju se dodjeljuju sredstva;
- Broj pojedinačnih i grupnih nagrada sa tačno naznačenim neto iznosom nagrada;
- Opšti uslovi i kriteriji za vrednovanje za dodjelu nagrade;
- Način prijave;
- Rok za podnošenje prijava;
- Način i rok saopštavanja odabira nagrađenih.

Član 7

Konkurs se objavljuje na web stranici Univerziteta i u Univerzitetskom informativnom glasniku – INFO.

Član 8

Prijava za učešće na konkursu dostavlja se poštom ili lično u Rektorat Univerziteta u Sarajevu i obavezno sadrži sljedeću dokumentaciju:

- Popunjeno obrazac za prijavu;
- Jedan primjerak rada/projekta/umjetničkog ostvarenja u elektronskoj verziji (na odgovarajućem audio-vizuelnom ili elektronskom mediju) i jedan odštampani primjerak;
- Potvrdu o redovnom studiju koju izdaje fakultet/akademija;
- Preporuku mentora rada/projekta/umjetničkog ostvarenja;
- Preporuku jednog nastavnika iz područja rada/projekta/umjetničkog ostvarenja koji student/grupa studenata prijavljuje za nagradu;
- Biografiju;
- Fotokopiju lične karte ili fotokopiju pasoša (za strane državljanje).

Uz prijavu, student može dostaviti spisak objavljenih radova i nagrada iz naučno-istraživačkog, stručnog, umjetničkog rada studenta, ukoliko je ranije objavljivao/la ili je nagrađivan/a, što nije obavezan uslov za prijavu na konkurs.

Član 9

Odabir radova/projekata/umjetničkih ostvarenja za dodjelu nagrada vrši Odbor Fonda.

Odbor Fonda čine:

- Predsjednik Upravnog odbora Univerziteta,
- Rektor,
- Prorektor za naučnoistraživački rad,
- Šest prodekana za naučno-istraživački/umjetnički rad, i to po jedan ispred svake grupacije,
- Generalni sekretar i
- Predsjednik Studenskog parlamenta.

Odbor utvrđuje konačan iznos Fonda za pojedinačne i grupne nagrade prije objavljivanja Konkursa.

Nakon isteka roka za podnošenje prijava na konkurs, zadužena Stručna služba Rektorata dostavlja Odboru prijave koje zadovoljavaju sve uslove iz konkursa, i to pod šiframa bez imena i prezimena kandidata. Odbor vrši ocjenu dostavljenih prijava i utvrđuje konačnu listu dobitnika nagrada sa novčanim iznosima.

Izuzetno, Odbor može tražiti i mišljenje profesora iz uže naučne oblasti iz područja rada/projekta/umjetničkog ostvarenja koji student prijavljuje za nagradu.

Radom Odbora predsjedava Rektor.

O toku sjednice vodi se zapisnik.

Procjena Odbora se smatra valjanom ako se o njoj javnim ili tajnim glasanjem izjasni natpolovična većina svih članova Odbora.

Član 10

Na osnovu prijedloga Odbora, Rektor donosi odluku o nagrađenim studentima, u roku ne dužem od 60 dana od dana zaključenja konkursa.

Odluka Rektora je konačna i obavezujuća.

Član 11

Lista dobitnika nagrada iz sredstava Fonda objavljuje se na web stranici Univerziteta i u Univerzitetskom informativnom glasniku – INFO.

Član 12

Nagrada koja se dodjeljuje sastoji se od pisanog priznanja i novčanog iznosa utvrđenog u budžetu Univerziteta u Sarajevu.

Sadržaj i oblik pisanog priznanja utvrđuje Rektor.

U slučaju grupne nagrade, svakom od studenata autora nagrađenog timskog rada dodjeljuje se priznanje, a novčani iznos nagrade raspoređuje se na jednake dijelove svim članovima tima.

Rektor svake akademске godine može dodijeliti jednu ili više posebnih nagrada studentu odnosno grupi studenata za izuzetan uspjeh u predstavljanju Univerziteta, javnom nastupu ili djelovanju (dramska, filmska, likovna, muzička, sportska grupa, udruženja studenata i sl.).

Posebna nagrada dodjeljuje se u obliku posebnog pisanog priznanja čiji izgled i sadržaj određuje Rektor.

Kada se posebna nagrada dodjeljuje grupi studenata, svakom članu grupe se uručuje zasebno priznanje o dodijeljenoj nagradi.

Član 13

Nagrade uručuje Rektor Univerziteta na prigodnoj svečanosti. Uručivanju nagrade prisustvuju nagrađeni studenti i senatori Univerziteta u Sarajevu, kao i uzvanici po odluci Rektora.

U slučaju spriječenosti ili odsustva nagrađenih, nagrada će biti uručena naknadno.

Član 14

U slučaju da neko od pitanja nije riješeno ovim Pravilnikom na odgovarajući način imaju se primjeniti odredbe Pravila Univerziteta u Sarajevu, Zakona o visokom obrazovanju, kao i drugih akata Ministarstva obrazovanja i nauke Kantona Sarajevo koja se odnose na dodjelu sredstava za projekte, stipendije i nagrade.

Član 15

Ovaj Pravilnik stupa na snagu danom donošenja.

Stupanjem na snagu ovog Pravilnika prestaje važiti Pravilnik o uvjetima, načinu i postupku za dodjelu sredstava studentima Univerziteta u Sarajevu iz Fonda za stimulaciju naučno-istraživačkog, stručnog i umjetničkog rada "Acc. Edhem Čamo", broj: 02-I-1840/07 od 03. 10. 2007. godine.

**PREDSJEDNIK
UPRAVNOG ODBORA**

Prof. dr. Sead Redžepagić

Sead Redžepagić
Broj: 02-38-2002/10
Sarajevo,
15.07.10

